



Glygge-Zyttig vo de  
JOKER WAGGIS

Usgoob 1 - im Hoornig 2012

## Events

Fasnachts-Apéro

SYTTE 3



## Unter der Lupe

Der Ruben

SYTTE 2



## Wettbewäärb

Blaggedde z'gwinne

SYTTE 2



# Ruggblig:

## D'JOKER WAGGIS an der Basler Fasnacht 2011 ...



Basler Faasnacht 2011 - Die erschti Faasnacht vo de JOKER WAGGIS mit acht Mitgליידer.  
Bild hinte: Fäb, Stephan, Galli, Ruben, Busi. Bild voorne: Mathias, Beni, Patrick (v.l.n.r.)

**Bi Traumwätter und Temperature um die 20 Grad het die vergangeni Basler Fasnacht stattgfunde. Vom Moorgestraich bis am Fasnachts-Mittwuch in der Nacht het der Petrus aimol mehr bewyyse, dass er e Basler isch. Ainzig der Ändstraich isch em Rääge zem Opfer gfallte – was doch aigentlig no ganz guet zer allgemaine Stimmig vom Momänt passt het.**

No e weeneli mied vom Blaggedde-Verkauff und em Moorgestraich, aber voller Vorfreud uff d'Fasnacht, hän sich die 8 JOKER am Mäntigmoorge in Muttentz zem Waagelaade troffe. Beraits doo isch alle JOKER klar worde, dass miir in unserem Goschdyyem e "heissi" Fasnacht vor uns hän. Der sujetbezoogeni Pullover isch drum bi de maischte JOKER grad wiider

versorgt worde, denn unter unsere "Schutzweschte" us Daune (!) isch es au ooni däa gnuet warm worde. Am Wettstaiplatz isch es denn um 13:30 Uhr uff d'Route gange. Nadyrlig isch me bi dääne Temperature massiv ins Schwitze ko, doch het me sich in der Pause mit eme JOKER BIER wieder könne erfrische. Au unser JOKER WASSER isch bi de Masse vo Zueschauer sehr guet aakoo. Die tradizioonelli "Daat" vor em Comité het nadyrlig au nit deerfe fääle. In däm Fall hän miir Statische als Harrasseläufer lo uffdrätte – vor jeedem Comité-Standort hän die denn miesse vo uns, der Spezial Harrasselauf Intervenzioons Truppe (S.H.I.T.), us em Wäg gschafft wärde. Und das het nit numme de Comité-Mitgליידer e Lächle uff s'Gsicht zauberet ...

WYTER SYTTE 2

#### FORTSETZIG

Aaschliessend an Cortège isch es zum Nachtässe ins Klingeli gange, bevor miir am Oobe nomol gmainsam uff der Gass und in diverse Baize sin go Intregiere.

Der Fasnachts-Zyschtig isch bi de JOKER WAGGIS wie allewyyl freywillig gsi. Am Noomidaag hän sich einige JOKER mit de Binggis als Zyschtigsziigli uff d'Gass gmacht – schliesslig muess jo au fiir der Nachwuggs gsoort sy. Am Oobe denn isch s'Bar-Wägeli wiider zem Ysatz ko. An der Birsig-Sinfonie bi der Draischibe hinter em Pickwick Pub het me d'JOKER

WAGGIS tradizionell aatroffe. Während em Ufftritt vo de Hunne, FUNatiker, usw. het me sich e Schlugg an der Bar kenne gnäämige. Und soo isch au däa Fasnachts-Zyschtig irgendwann usklunge ...

So isch numme no der Fasnachts-Mittwoch bliibe. Bi e weeneli kielere Temperature hän mir uns nomol besammelt. Nadyrlig sin die letschte Dääg nit spurloos an uns verby gange. Doch an der Fasnacht wird prinzipiell nit schlapp gmacht. So sin miir au am Mittwoch nomol voller Elan uff d'Route. Wie allewyyl isch am zwaite Cortège der Publikums-

Uffmarsch e weeneli glainer, derfiir triffsch bim Intregiere efter ebber wo Dyy Sprooch schwätzt. Geege s'Änd vom Cortège sin denn die erschte Räägedropfe gfalle. Was der guete Stimmig aber no kai Dämpfer verpasst het. Leider isch es in der Nacht uff e Donnschtig allewyyl mehr worde, so dass es uff der Ändstraich hii e ungmietligi Sach worde isch.

Trotz däm fiechte Abschluss kenne mir uff e scheeni Fasnacht zrugg bligge. Zum erschte Mol zu acht, wird au die 15. Fasnacht vo de JOKER WAGGIS e unvergässligi Sach bliibe.

## Unter der Lupe: Der Ruben

**In dääre Rubrigg wird allewyyl ai JOKER genauer voorgstellt. Diesmol nämme miir der Ruben - e Ehemolige - unter d'Lupe.**

**72stunde: Wie alt bisch Du?**

Ruben: 32, wiird in däm Joor 33.

**72stunde: Wo bisch Du dihaim?**

Ruben: Im Glaibasel.

**72stunde: Was machsch brueflig?**

Ruben: Ich schaff in ere Telekommunikazions-Firma

**72stunde: Was machsch Du in Diiner Freizyt?**

Ruben: Ich spiil Inline-Hockey bi de "Muttenz Legends", bsuech FCB-Mätch und nadyrlig Fasnacht.

**72stunde: Wie lang bisch Du bi de JOKER WAGGIS gsi?**


Ruben: 10 Joor. Vo 2001 bis 2011.

**72stunde: Wie bisch Du zue de JOKER WAGGIS gstoosse?**

Ruben: An der Fasnacht 2000 - d'JOKER WAGGIS sin noonig offiziell gsi - ha ich bi de JOKER WAGGIS s'Handwägeli zooge. Ai Joor speeter bin ich uffgno worde.

**72stunde: Was isch Dii spezielli Funggzioon bi de JOKER WAGGIS gsi?**

Ruben: Mitorganisazioon vo Events, Grillmaischter, usw.



**72stunde: Weeles isch Dii scheenschti Fasnacht gsi?**

Ruben: Jeedi Fasnacht isch speziell und ainzigaartig.

**72stunde: Und weeles isch Dii scheenschts Erläabnis mit de JOKER WAGGIS gsi?**

Ruben: Jeedes Joor deerfe die drey scheenschte Dääg erlääbe.

**72stunde: Wie gseet Dii Zuekunft rund um d'JOKER WAGGIS?**

Noch 10 Joor bi de JOKER WAGGIS han ich mi derzue entschlosse, als Aggtiv-Mitgliid usdrätte. Ich wird bi de JOKER WAGGIS Passiv-Mitgliid bliibe.

## Passiv-Mitgliid wärde?

JOKER WAGGIS dien miir uns nenne, e Mänge duet uns z Basel kenne.

Mee als 15 Joor - es isch e Hit, faare miir am Cortège mit.

Dien s Fasnachtmache zelebriere, nit numme Stopfe - au Intregiere.

Doch au unterem Joor - s meergt jeede bald, pflääge miir unsere Zämmehalt.

Miir acht miir sin e gladde Huffe, mit uns kasch lache, feschte, suffe ...

Wenn Duu jetz dänggsch: "Jää, das isch Spitze, die Glygge mecht yych unterstitze".

Denn waart nimm z lang und schriib Dii yy, scho bisch als Passiv-Mitgliid derby.

Fir 25 Frangge - s isch nit vergäabe, kasch s Faasnachts-Joor mit uns erlääbe!

Aamäldige als Passiv-Mitgliid unter: [www.joker-waggis.ch](http://www.joker-waggis.ch)



## Wettbewäärb ...

Jetzt git's ebbis z'gwinne!

Wäär weiss, in weelem Joor mir JOKER WAGGIS zum erschte Mol am Cortège aazdräffe gsi sin, ka e

silbrigi Basler Fasnachts-Blaggede 2012 gwinne. Hilf und Tipps findet me au uff unserer Homepage.


Antwoorte bitte bis speeteschtens 25. Hoornig 2012 an:

[redaggzioon@joker-waggis.ch](mailto:redaggzioon@joker-waggis.ch)



## Fasnachts-Programm 2012

Dermit unseri Frinde und Passiv-Mitglieder d'Meegligkait hän, uns am Cortège aazdräffe, git's doo unser Fasachts-Programm fir die 2 Dääg. Alli Zytte sinn nadyrlig ooni Gwäär – und au die obligati Verspeetig vo de JOKER WAGGIS isch noonig beruugsichtigt worde.



### Fasnachts-Mäntig

**13:30 Uhr**  
Start am Wettstaiplatz (33)  
**13:45 Uhr**  
1. Pause am Mässplatz (23)  
**14:00 Uhr**  
Wyter goot s ...  
**14:45 Uhr**  
2. Pause am Claraplatz (11)  
**15:00 Uhr**  
Wyter goot s ...  
**15:45 Uhr**  
3. Pause in dr Gärbergass (87)  
**16:15 Uhr**  
Wyter goot s ...  
**17:00 Uhr**  
4. Pause bim Banggverain (67)  
**17:15 Uhr**  
Wyter goot s ...  
**17:45 Uhr**  
Waageleere am Wettstaiplatz (33)  
**18:30 Uhr**  
Waage versoorge  
**22:30 Uhr**  
d JOKER WAGGIS uff dr Gass

### Fasnachts-Mittwuch

**13:30 Uhr**  
Start am Wettstaiplatz (38)  
**14:15 Uhr**  
1. Pause bim Banggverain (62)  
**14:30 Uhr**  
Wyter goot s ...  
**15:00 Uhr**  
2. Pause in dr Freye Strooss (68)  
**15:30 Uhr**  
Wyter goot s ...  
**16:15 Uhr**  
3. Pause in dr Utegass (4)  
**16:45 Uhr**  
Wyter goot s ...  
**17:15 Uhr**  
4. Pause bim Mässplatz (28)  
**17:30 Uhr**  
Wyter goot s ...  
**17:45 Uhr**  
Waageleere am Wettstaiplatz (33)  
**18:30 Uhr**  
Waage versoorge  
**22:30 Uhr**  
d JOKER WAGGIS uff der Gass  
**04:00 Uhr**  
d JOKER WAGGIS am Ändstraich

## Fasnachts-Apéro 2012



Am Fasnachts-Mäntig, 27. Hoornig 2012 findet zum erschte Mol in der Gschicht vo de JOKER WAGGIS e offizielle Fasnachts-Apéro statt.

Ab 12:30 Uhr git's am Wettstaiplatz ebbis zum Aastosse für alli unseri Familie, Frinde, Bekannte und Passiv-Mitglieder. Doo derzue trifft me sich bim Waage vo de JOKER WAGGIS vis-a-vis vom Restaurant Resslerytty.

## Usbligg uff s'Joor 2012

Obwohl mir jetz noonig an d'Zyt nach der Fasnacht dängge wänn, wird's au im Joor 2012 für d'JOKER WAGGIS wyter go.

Bereits am Wuchenänd nach der Basler Fasnacht goht's an der Muttenger Fasnacht wyter. Doch au duur s'Joor verdailt warte einigi Termin uff uns. Doo findet me scho Mol die erschte Daate/Ydee:

### 03. Meerz 2012

Muttenger Fasnacht. D'JOKER WAGGIS fiere e Verpfälliggsstand.

### 18. Meerz 2012

JOKER-Bummel

### in Juni/Juli 2012

JOKER WAGGIS-Grillplausch

### ab Juli/Auguscht 2012

Aafange mit Waagebau

### im Novämber 2012

JOKER WAGGIS-Mässbummel

Die maischte Daate sin im Momänt no ooni Gwäär. Passiv-Mitglieder und Frinde wärde aber rächtzyttig über die einzelne Daate informiert.